



Rabu, 14 Agustus 2024
Ogen: Amos 5:12-15



"DARAMILAH SI MEHULI"



Bas erbage-bage belahan doni mbue kal kejahatan korupsi terjadi. Ntah uga maka bage.. Banci jadi perban sen korupsi e murah ndatca ras bagi kena durin runtuh makana, mbue kalak talu kebiarenna perbahan riahna akapna ndatken mbue sen. Senna banci ipakena guna foya-foya ras nehi sura-sura daging si la pernah besar. Banci jadi pe erkiteken system si nggo mendarah daging dem alu korupsi, si la korupsi iakap pebadia-badiaken bana, janah la erteman bas dahinna, mesera meningkat posisi ntah jabatenna adi la ka ngikuti si enterem. Talu idealismena perban kebiarenna. Bangsa Israel i bas masa nabi Amos, paksana ngenanami situasi si jaya. Subuk Israel Selatan ras Israel Utara ipimpin raja si megegeh si mbabai bangsa e banci ngenanami kebayaken. Tapi i bas dampar sideban moral bangsa e runtuh. Iberekenna persembahenna man Tuhan tapi pusuhna ras kegeluhenna si teptep wari la nuduhkan kegeluhen si ngena ate Dibata. Iakapna perban persembahenna, Tuhan tetap ras ia janah kebal arah kesusahen, e maka labo diatena kal ersembah man Tuhan alu tutus. Em sababna lagu langkahna pe desken kalak si la nandai Tuhan. Korupsi, mpermainkan hukum, erbahan kejahatan e nggo jadi cara geluhna teptep wari. E maka suruh Tuhan Nabi Amos mpersingetti bangsa e. Gelah daramina si mehuli, dingen nadingken si jahat. Kai si mehuli e? Engkelengi Tuhan lebihen asangken kai pe, ndarami si ngena ateNa, e me kebenaran, keadilan, kebijuren. I bas perayaken geluh ula min kelengen ateta pencarin e asangken Tuhan. I bas ndatken rejeki alu mengandalken caraNa, e me alu jujur, sue ras etika pendahin si mehuli, make prinsip si adil, si beluhlah ia erpalasken uji kelayaken ras siterakhir daramilah pendapatan alu cara si benar. Alu bage malem ateta sabap sinidahiken kita e ngena ate Tuhan, ulihna pe jadi pasu-pasu. Terpan anak jabuta, jadi alat Tuhan nikapken masa depanna. Ngolangi kita arah pemaken erta si la ertinutu.

☞ Kebayaken si tuhu-tuhuh rehina bas Dibata nari